

Protocol

dalla radunonza communal dils 14 da mars 2024 ella halla polivalenta a Trin

- Il president communal Maurus Caflisch beneventa 44 personas all'empreda radunonza communal digl onn 2024.
- Igl invit ei vegnius distribuius ad uras. La gliesta da tractandas vegn approbada.
- Sco dumbravuschs vegnan Nicolas Büchi e Bruno Frischknecht eligi.

Tractandas:

1. Protocol dalla radunonza communal dils 14 da december 2023
2. Project sanaziun digl access Uaul Grond, credit da fr. 160'000.-
3. Cumpra d'in indrez da scuar e da tschitschar, credit da fr. 80'000.-
4. Varia

1. Protocol dalla radunonza communal dils 14 da december 2023

Duront l'exposiziun publica dils 12 da schaner tochen ils 12 da fevrer 2024 ein neginas objecziuns entradas. Il protocol vala damai sco approbaus. All'actuara vegn engraziu per sia lavur da redeger il protocol.

2. Project sanaziun digl access Uaul Grond, credit da fr. 160'000.-

Il president communal introducescha la tractanda. El fa attents ch'ins ha presentau alla davosa radunonza communal il preventiv per la «renovaziun dalla via d'uaul Purcs». Cheu ha ei dau ina malcapientscha. Il preventiv vala buca per la via d'uaul Purcs, mobein per la «renovaziun digl access Uaul Grond». La summa dil credit che vegn dumandaus oz resta tuttina gronda. Per explicaziuns detagliadas surdat il president il plaid al schef dil departament Hans Jakob Telli.

Il schef dil departament informescha ch'igl Uffeci d'uaul e prighels dalla natira dil Grischun hagi mess a disposiziun in menader da project per elavurar il project. Tier las vias d'uaul pertuccadas che vegnevan duvradas gia ils onns 1960 per lavurs forestalas settracta ei dallas vias dil plaz da volver al Lag la Cresta en direcziun da Conn. La finamira dalla sanaziun ei da puspei garantir la capacita da carga dallas vias. Entras ils transports da lenna grevs piteschan las vias enormamein: la stresa purtonta, las chinettas transversalas ed ils rovens dalla vart dallas vias ein en in schliet stadi. La lunghezia totala dalla sanaziun dalla via cumpeggia ver 2'400 meters. Sin ca. 400 meters vegnan renovadas las stresas da basa e d'isada, sin 1'900 meters vegnan quellas stresas renovadas per part, tut las chinettas transversalas vegnan remplazzadas (ca. 60 tocs) ed ils urs e rovens vegnan sanai. La sanaziun vegn realisada enteifer dus onns digl agen persunal dil luvratori forestal da Flem e Trin. Ils vehichels necessaris vegnan preni a tscheins dalla vischnaunca da Flem.

Igl Uffeci d'uaul e prighels dalla natira schazegia che las lavurs cuostien fr. 160'000.-. 50 % dils cuosts vegnan subvenziunai. Aschia muntan ils cuosts nets a totalmeins fr. 80'000.- resp. fr. 40'000.- ad onn.

Il president communal arva la runda da discussiun. Da quella vegn buca fatg diever.

La suprastanza communal propona d'approbar il credit da fr. 160'000.-. La proposta vegn approbada cun gronda maiorita.

3. Cumpra d'in indrez da scuar e da tschitschar, credit da fr. 80'000.-

Il schef dil departament Marco Capatt introducescha la tractanda. Il vehichel communal dil tip Holder posseda la vischnaunca gia. En quella tractanda va ei mo per la cumpra e la montascha digl indrez da

scuar e da tschitschar. Il vehichel communal han ins tochen ussa duvrau surtut per il menaschi d'unviern. Biaras lavurs dalla primavera e stad han ins tochen ussa realisau u a maun ni ch'ins ha surdau las lavurs a tiarzs. Cun la cumpra da quei indrez da scuar e da tschitschar savessen biaras lavurs vegnir fatgas dalla gruppa dil luvratori: schubergiar molocs, schubergiar chinettas e tumbins e schubergiar las vias en general. Aschia savess ins era duvrar igl entir onn ora il vehichel communal. Il preci d'offerta per la cumpra da quei indrez da scuar e da tschitschar munta a fr. 80'000.-.

Il president communal arva la runda da damondas e da discussiun. Da quella vegn buca fatg diever.

La suprastonza communal propona d'approbar il credit da fr. 80'000.-. La damonda vegn approbada cun gronda maioritad.

4. Varia

Il president communal informescha ch'il salun da coiffeur el baghetg dall'administraziun sappi vegnir daus a tscheins da niev.

Il schef dil departament Marco Capatt informescha davart la planisaziun d'utilisaziun. L'exposiziun da cooperaziun publica ha giu liug dil november tochen il december 2023. Ver 50 propostas ein vegnidas inoltradas alla suprastonza communal. Ellas ein vegnidas examinadas ed elavuradas. Las rispostas vegnan tarmessas ils proxims dis per posta. Per saver prender envesta dallas midadas fatgas vegn ina nova ediziun publicada l'entschatta avrel. La suprastonza communal ha la finamira da presentar la revisiun dalla planisaziun locala alla radunonza communal dils 21 da zercladur 2024.

Il schef dil departament Hans Jakob Telli informescha che las lavurs dalla meglieraziun generala entscheivien la primavera – tenor plan l'entschatta matg. Ei vegn entschiet cun la dislocaziun dalla via a Manalla. Las interpresas da baghegiar han giu temps tochen oz da far lur offertas ed aschia vegnan las lavurs surdadas proximamein. Ils plazzals vegnan mintgamai signalisai cun las lavurs previdas e las personas pertuccadas vegnan preinformadas.

Il president communal informescha ch'ei vegni a dar ils 27 da matg 2024 ina radunonza communal supplementara per la votaziun davart la gestiun futura dall'ovra electrica Pintrun. Perquei che la fatschenta ei fetg cumplexa dat ei ils 30 d'avrel 2024 in'occurrentza d'informaziun publica.

Il president communal dat alla populaziun la caschun da plazzar supplicas/remarcas sut varia.

Dalla populaziun vegn la damonda tgei che las novas colurs digl uoppen enteifer la vischnaunca resp. la nova bandiera sper scola hagian da muntar. Il president communal informescha che quei hagi da far cun la nova cumparsa dall'administraziun communal, dalla scola e dil luvratori communal. Igl uoppen resti denton il medem sco tochen dacheu e vegni era duvraus vinavon en divers loghens.

Fin dalla radunonza allas 20.40.

Trin, ils 14 da mars 2024

il president communal:

l'actuara:

Maurus Cafflisch

Olivia Buonvicini